

**Kalaallit Nunaanni sakkut pillugit inatsimmik allannguissamut siunnersuut (Aallaasinik il.il. pigisaqarnissamut ukiunik killiliineq kiisalu aallaasinik il.il. inissiivinnik piunasaqaat) Kalaallit Nunaanni Namminersorlutik Oqartussanit taparserneqarnissaa pillugu Inatsisartut aalajangiiffigisassaattut siunnersuut**

(Aalisarnermut, Piniarnermut, Nunalerinermut Imminullu Pilersornermut Naalakkersuisoq)

**Akissuteqaat**

(Aalisarnermut, Piniarnermut, Nunalerinermut Imminullu Pilersornermut Naalakkersuisoq)

**Aappassaaneerneqarnera**

Naalakkersuisut sinnerlugit Inatsiseqarnermut Ataatsimiititaliaq isumaliutissiissutaanut siunnersuummillu peqqissaartumik suliaqarneranut qutsaviginiarpara. Naammagisimaakkannik maluginiarpara ataatsimiititaliami amerlanerussuteqartut siunnersuutip akuerineqarnissaa inassutigigaat. Ilutigisaanik arajutsinngilara aarleqqutinik saqqummiussisoqarnera, siunnersuutip siunertaanngikkaluartumik kalaallit kulturiannut sunniuteqarsinnaaneranut tunngasumik. Siunnersuummi tamanna siunertaanngilaq akuersissutigineqarpallu kingunerinaviarnagu.

Naalakkersuisut piniarnerup kinaassusitsinnut oqaluttuarisaanitsinnullu ilaanera ilisimalluinnarpaat. Taamaattumik ileqqutoqqat malillugit meeqqat ilisimasanik piginnaasanillu kinguaariinnit kinguaariinnut ingerlateqqinneqartartunik ilikkarnissaannut ukioqassutsimut piunasaqaatit akornutaasinnaaneranut politikikkut ernummatigineqartut pimoorullugit tiguaat. Taamaattumik erseqqissaatiginissaa pingaaruteqarpoq siunnersuut inatsisit atuuttut malillugit suliarineqarmat, matumani Pinerluttulerinermi inatsimmi § 90 kiisalu piniarnermut aallaaniarnermullu inatsimmi ukioqassutsimut piunasaqaatit, nammineerluni nakkutigineqarani aallaaseqarsinnaanissamut nammineerluniluunniit piniarsinnaanissamut aqqaneq marlunnut ukiukinnerpaaffiliisut. Ingiallorteqarnissamut aaqqissuussap atuutilersinneratigut meeqqat piniarnermut peqataasinnaanissaat inersimasunillu ilitersuunneqarnissaat qulakkiissavarput — aamma suliaqarfimmi inatsisit siunissami allanngoraluarpataluunniit.

Naalakkersuisunit pingaartinneqarpoq eqqarsaatigineqassasoq meeqqat inersimasulluunniit ”pinerluttutut” isiginiarneqalinnginnissaat, meeqqalluunniit pillaatissinneqarsinnaanerminnut ukiuisa ammut killingat pineqaralarpat. Siullermeerneqarmat saqqummiunneqarpoq meeqqat siusissukkut sakkunik atuinissaminnut periarfissaqartariaqartut. Pingaartuuvoq erseqqissassallugu siunnersuummi matumani sakkut pillugit inatsisip allannguutaani meeqqat aqqaneq marluk inorlugit ukiullit sakkunik atuinissaat pillugu inatsisit atuuttut allanngortinniarneqanngimmata. Ullumikkut inerteqqutaareerpoq navianarsinnaasunik tunniussinissaq, tassunga ilanngullugit sakkut, meeqqanut 12-t inorlugit ukiulinnut,

pinerluttulerinermut inatsimmi § 90-imi nassuiaatini allassimasoq malillugu tamanna inersimasumik nakkutigineqarluni pinngippat.

Taamaakkaluartoq Naalackersuisut isumaqatigiissutigaaat meeqqat peqataanerat pinerluttunngortitsisaarutaassanngitsoq. Taamaattumik siullermeerinninnermi oqallinneq Inatsiseqarnermullu Ataatsimiititaliap isumaliutissiissutaa tunngavigalugit Naalackersuisut piniarnermut aallaaniarnermullu inatsimmi kiisalu pinerluttulerinermut inatsisip nassuiaataani aalajangersakkat naleqqussarniarpaat, meeqqat aqqaneq marluleereersimatinnagit inersimasumik ingiallorteqarlutik piniariarnermut peqataasinnaaniassammata.

Naalackersuisut taamatut oqaaseqarlutik siunnersuut taamatut isikkoqartillugu aappassaaniigassanngortippaat.